



Inatsisartunut ilaasortaq,  
Hans Enoksen,  
Naleraq  
Maani/

**RG-p kilisaataani inuttat pillugit § 37 naapertorlugu apeqqummut nr. 154-imut akissut**

Ulloq: 15-07-2024  
Suliap normua: 2024 - 13610  
All. nr. 24331153

Inatsisartut Suleriaasianni § 37, imm. 1 naapertorlugu RG-p kilisaataani inuttat *pillugit Naalakkersuisunut apeqqutinik saqqummiussaqaqputit*. Apeqqut suliassaqaqfigisannit akineqartussanngorlugu innersuunneqarnikuuvoq.

Postboks 269  
3900 Nuuk  
Oqarasuaat (+299) 34 50 00  
Fax (+299) 34 63 55  
E-maili: apn@nanoq.gl  
www.naalakkersuisut.gl

**1) Royal Greenland-ip kilisaataataani inuttaqarneq eqqarsaatigalugu massakkut qanoq inissimasoqarpa aqumiut kalaallit eqqarsaatigalugit qassit kalaallit aquttarfimmi sulippat?**

**1-imut)** Apeqqut taanna akisinnaajumallugu Royal Greenland A/S-imit paasissutissanik piniarnikuuvugut. Tamatumunnga pissutaavoq, Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. november 2011-meersoq naapertorlugu Kalaallit Nunaanni Aalisarsinnaanermut Akuersissutinik Nakkutilliisoqarfik inuttat Kalaallit Nunaanni najugaqarnersut taamaallaat misissortarmassuk, kalaaliunersullu misissortarnagu.

Royal Greenland ilisimatitsivoq "Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. november 2011-meersoq naapertorlugu Royal Greenlandip kilisaataani kalaallit aqumiut 127-t atorfeqartut, taakkunannga aquttut 35-t kalaaliullutik".

**2) Umiarsuit qassit kilisaatit Royal Greenland-ip pigisai aalisarpat?**

**2-mut)** Apeqqut taanna akisinnaajumallugu Royal Greenland A/S-imit paasissutissanik piniarnikuugut.

"Royal Greenlandip kilisaatit/umiarsuit tallimat tamakkiisumik pigisarai. Tamatuma saniatigut Royal Greenland A/S kilisaatinut sisamanut piginneqataaffigisaminnut aqutsisuuvoq. Kilisaatit/umiarsuit qulingiluat tamarmik ingerlapput, imaattoqarsinnaavorli kilisaatit ilai uninngasut amutsivimmiinneq pissutigalugu imaluunniit ukiup ilaani aalajangersimasumi aalisarnissamut utaqqimaartut."

- a. **Aammalu kalaallit umiarsuarni naalakkat inuttallu qassiuppat?**
- b. "Kilisaatitsinni inuttat 381-it missaanniipput, aalisagaqatigiilli aalisarneqartussat qanoq ittuunerat aallaavigalugit allanngorarsinnaasarpur. Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. November 2011-meersoq naapertorlugu Royal Greenlandip kilisaataatani kalaallit naalakkatut sulisut 14-upput.**taamatullu aamma kalaallit umiarsuarni aquttut qassiuppat?**

"Kalaallit aquttut 35-upput."

**3) Aamma paaserusuppara ukiut tallimat iluanni kilisaatini inuttat immikkut nunatta avataani najugallit akuersissummik tunillugit kilisaatinut inuttanngortitat qassiuppat?**

**3-mut)** Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. november 2011-meersoq naapertorlugu, nalinginnaasumik inuttat tamarmik ukiut kingulliit marluk Kalaallit Nunaanni najugaqarsimassapput akileraartussaataasimassallutillu. Tamatuma saniatigut aqumiut 60%-ii ukiut kingulliit marluk Kalaallit Nunaanni najugaqarsimassapput akileraartussaataasimassallutillu. Ilinniarneq pissutigalugu ukiut kingulliit marluk iluanni Kalaallit Nunaata avataani najugaqarsimagaanni immikkut akuersissummik tunniussisoqarsinnaavoq. Nalunaarummi aqumiut nassuiarneqarpur soorlu ima 1) angallatip naalagaa, 2) aquttut, 3) igasoq/pilittaq, 4) qaavani sulisut naalagaat aamma 5) suliffissuarmi pisortaq aamma suliffissuarmi aqutsisoq.

Aalisariarnerit tamaasa angallatini inuttat allattorsimaffiat ajunnginnersoq KANUAANA-p misissortarpar. Royal Greenlandip kilisaataani angallammiillutik sulisut nunanilu allani najugaqarfeqartut 2024-mi maannamut assigiinngitsut 89-it KANUAANA-p nalunaarsorsimavai.

**4) 2019-mi immikkut akuersissummik nunatta avataani najugallit kilisaatini inuttanngortillugit akuerisat qassiuppat.**

**4-mut)** 2019-imi Royal Greenlandip kilisaataani angallammiillutik sulisut nunanilu allani najugaqarfeqarsimasut najugaqarfeqartulluunniit assigiinngitsut 124-t KANUAANA-p nalunaarsorsimavai.

**5) 2020-mi immikkut akuersissummik nunatta avataani najugallit kilisaatini inuttanngortillugit akuerisat qassiuppat**

**5-mut)** 2020-mi Royal Greenlandip kilisaataani angallammiillutik sulisut nunanilu allani najugaqarfeqarsimasut najugaqarfeqartulluunniit assigiinngitsut 116-it KANUAANA-p nalunaarsorsimavai.

**6) 2021-mi immikkut akuersissummik nunatta avataani najugallit kilisaatini innuttanngortillugit akuerisat qassiuppat.**

**6-imut)** 2021-mi Royal Greenlandip kilisaataani angallammiillutik sulisut nunanilu allani najugaqarfeqarsimasut najugaqarfeqartulluunniit assigiinngitsut 128-t KANUAANA-p nalunaarsorsimavai.

**7) 2022-mi immikkut akuersissummik nunatta avataani najugallit kilisaatini innuttanngortillugit akuerisat qassiuppat.**

**7-imut)** 2022-mi Royal Greenlandip kilisaataani angallammiillutik sulisut nunanilu allani najugaqarfeqarsimasut najugaqarfeqartulluunniit assigiinngitsut 141-t KANUAANA-p nalunaarsorsimavai.

Inussiarnersumik Inuulluaqqusillunga



Kim Kielsen

Aalisarnermut Piniarnermullu Naalakkersuisoq